

GÁLATAS

Yi Necy Huidibi Pablo Yajnigujx Je Mibijcpidijc Jim Gálatas

1 Hich Pablo, Jesucristo xyquejxich co ngapxhuäcxibyich yi' y'ayuc. Ca' nminaanim jäy ajcxy xyajni'bijcich jada tung. Jesucristo etz Dios Teedy ajcxy ti xyajni'bicyich jada tung. Je' je' je Dios huidibi yajjugypijc Jesucristo co y'o'cy. ²Hich etz tüg'óciy migügtijc ajcxy huidibi ya yajpatp ma iich nyajnigujxpich jada necy ma nidüg'óciy pinjaty mijpidacp Jesucristo, huidijaty naymujcip ma nidüg nidüg cajp jim Gálatas naaxjot. ³Nmibijctzooybich Dios Teedy etz iich ajt nHuindzin Jesucristo co huen oy'ajt etz may'ajt tuñ ma miich ajcxy etz nañ jadu'n xyajjotcugihuip ajcxy. ⁴Hich ajt nHuindzin Jesucristo ti nayyoxyii ti naydogyii ci'm anajty ma yi o'cin miid iich ajt nbocy ycixpi. E jadu'n ti xyñihuaanim ma je jäy ajcxy huidibi jibic huinma'ñ ymiid huidibi tzinaayb ajcxy ma jadachambi xii tiempo. Jadu'n Jesucristo tuñ miid iich ajt ycixpi, com iich ajt nDios Teedy jadu'n tzojcp. ⁵iOoy y'oyity co Dios Teedy huen mij etz cōmay y'idipy huinixii huinitio! Jadu'n jada. Amén.

**Ca'p ji huingbi tiy'ajt huidibi
jäy y'alma yajnīdzocp**

⁶Ooy ndzachhuinmaayich jadu'n nej tim tzojcy ti mjijpyöyduxcixy je Huindzin Dios ytiy'ajt. Dios xyhuin'ijxcixy jigix jēbi mmibijccixy je oy'ajt je may'ajt huidibi Jesucristo ytuun miid miich ajcxy ycixpi. E miich ajcxy ti mhuinma'ñ myajtigajtzcixy, e ti mmibijccixy huingbi jäy ajcxy y'ayuc, jadu'n nej ca' jēbi m'alma nidzoocin padaangixy. ⁷Ca' nminaanim co ji jadügnax Dios ytiy'ajt. Hue' je'nijējity jäy ajcxy ti xyajhuinma'ñyidigooygixy, ooy ajcxy yajtigadzaangixy je Dios y'ayuc ytiy'ajt nej Jesucristo xyajnīdzōgaani ajcxy m'alma. ⁸Co ixypy iich, o co ixypy nidüg iich ndiscipulo, o co ixypy tüg ángel huidibi tzajpjoty tzomb capxhuäcx ixypy ma miich ajcxy ayuc tiy'ajt tigachjaty huidibi ca' ñaybadyii miid je tiy'ajt huidibi nyaj'ixpijc ajcxy oga'n'aty, ca' mgöb'ijccixipy yijadu'mbi ayuc huidibi ajcxy xyajniidigoyaangixy

xyajtüdigoyaangixy, Dios tzaachytuniib yi' ajcxy y'alma. ⁹Ti jayijp nyajnimay, e cham jadüg'oc nìgapxpetyich, pen ji pinjaty capxhuäcxy ma miich ajcxy tiy'ajt tigachyjatypi, huidibi ca' ñaybadyii miid je tiy'ajt je tiibi miich ajcxy m'ixpijccixy, copicy Dios chaachytunipy jada jäy miid ypocy ycixpi huidibi xychachyajniidigooygixp xychachyajtüdigooygixp.

¹⁰Co jadu'n nminal'ñich, ñej mdijy co ndzocyich co jäy ajcxy xyjäygidägipy o co Dios xyjäygidägipy? ñNej ndzachyajjot'adaanich jäy ajcxy? Ca' huaad nduunich huidibi jäy ajcxy chojcpy, yi' janchtiy ndumbyich huidibi Dios chojcpy. Co ixypy nduunich huidibi jäy ajcxy yjäygidacpy, ca' ixypy nguyduunich Cristo ytiy'ajt.

Nej Pablo oy paady je apóstol'at

¹¹Paady ndzocyich migügtijc co mnejhuihuip ajcxy jada co je Dios y'ayuc ytiy'ajt huidibi ngapxyhuäcxpich anajty ma miich ajcxy jadu'n nej jëbi ajcxy m'alma ñidzögipy, ca' yi' ayuc'adyii tiy'ajt'adyii huidibi jäy ci'm ti cojcixy ti maacxcixy. ¹²Com je Dios y'ayuc ytiy'ajt huidibi nmiidich, ca' ti nbaadyich ma jäy ajcxy, nañ ca' nminaanim jäy ajcxy ti xyaj'ixpicyich. Jesucristo ci'm ti xyajhuinjihuüyich jada tiy'ajt.

¹³Com miich ajcxy mnejhuiygixp jadu'n nej jecy'ajty iich ti ndzinäyich, co iich anajty nmijpidägyich yi judfojäy ajcxy ycostumbre. E mnejhuiygixp

jadu'n nej jecy'ajty n'ixhuidijtyich nbahuidijtyich mictägy je jäy ajcxy nidüg'óciy huidijaty anajty mijpidaaccixp Dios ytiy'ajt. ¹⁴Nigi iich anajty n'ixpícyidyich ma yi judfojäy ajcxy y'ixpijcin ca'ydi jac pinjaty judfojäy, ca'ydi jac pinjaty nmigügtijcich huidibi tügnax yjimijt miid iich. Com ooy anajty nigi ndzachmijpidägyich n'ap ndeedyich y'ayuc. ¹⁵E Dios xyhuin'ijxich jayijpni ca'ni anajty ma'xung'atyñich co ndúnibich yi' ytung. Miid co Dios ooy ti xychocyich ti xyjihuiyich, paady xyhuooyich miid ytung ycixpi. ¹⁶Dios xyajnejhuiyich yi y'ung y'ayuc ytiy'ajt, jigix ngapxhuäcxibich yi' y'ayuc ma yi jäy ajcxy ca'pi yjudfojäyity ajcxy. Ca' pinjaty n'ixtaayich huidibi jëbi xyaj'ixpicyich Dios ytiy'ajt, hue' Dios ci'm xyaj'ixpijcyich yi' ytiy'ajt. ¹⁷Nañ jadu'n ni ca' nbättigiyyich jim Jerusalén ma yajpaady y'apóstoles ajcxy huidibi anajty ajcxy Dios ti yhuin'ixyii. Chi tiyi nnicxyich jim Arabia ñaaxjot. Co iich jim hueeni n'ijtyich, chi nhuimbijtyich jim Damasco.

¹⁸Cooni tugiig jimijt nhuäcxijpyich huin'itni nbättigiyyich jim Jerusalén. Chi n'oyich ma Pedro anajty yajpaady, e chi jim nmiid'ijtyich jëyi majmocx xii. ¹⁹E ca' nminaybaattich yi jacjadyii apóstoles. Jëyi iich miid naybaati je Jacobo, je Huindzin Jesús y'uch. ²⁰Je huidibi cham iich miich ajcxy niyajjayiigixyp, tiy'ajt yi'. Y'ijxyp ñejhuiyb Dios co ca' n'iindägyich.

²¹Co ndzoonich Jerusalén, chi nnicxyich Siria naaxjot etz

jim Cilicia naaxjot. ²² Je huin'it tiempo yi Cristo yjáy ajcxy huidibi nayyöymujcip cajp cajp jim Judea naaxjot, ca' ajcxy anajty xy'ix'adyiijich huingíxy jijpcíxy. ²³ Jëyi ajcxy nejhuüy anajty co jáy chachminaangixy: "Yi jáy huidibi anajty yxhach'ixhuidijtim yxhachpahuidijtim, cham yi' tzachcapxhuäcxy je Cristo ytiy'ajt, je tiy'ajt huidibi anajty ytimyyajcödigoyamyb." ²⁴ Co je mibijcpidijc oy jadu'n tiy'ajt nejhuüiygixy, chi ajcxy yajnajxy Dioscojuyip ma Dios miid iich yixipi.

**Jacjadyii Jesús y'apóstoles
ajcxy cöbijccixy yi Pablo**

2 Co majmactz jimijt, chi jadüg'oc nnicxyich jim Jerusalén quipxyi miid Bernabé. Nañ jadu'n Tito xypanicxyich. ² Dios jadu'n ti xyajnejhuüyich co copicy nícxibich jadüg'oc jim Jerusalén. Chi jim nyajmiidmiydacyich nijëjity jáy huidibi Jesús ti yhuin'ixyii ajcxy, je huidibi ajcxy nigohuajc'ajtp anajty je mibijcpidijc. (Ahuingujc iich ajcxy nxiicmujcy ngapxmujcy, ca'ydi ymayjáy'agujcity.) Nyajmiidmiydactaayich je Dios y'ayuc ytiy'ajt huidibi ngapxhuäcxypich ma yi jáy ajcxy ca'p yjudfojáyity. Jadu'n ngapxtíxcyich n'ayucich ndiy'ajtich, jigix ca'ydi ajcxy xycapx'aducyich, e ti anajty jadu'nñi ñaadig'i'aty iich ndung huidibi jayijp ti nduunich etz huidibi njactunaamybich anajty. ³ Je jáy ajcxy huidibi nigohuajc'ajtp anajty je mibijcpidijc jim Jerusalén

yjáygidac ajcxy iich n'ayuc jadu'n nej ngapxtíxcyich, e nañ ni ca' ajcxy yminañ adzip co copicy yajtiy'ajttíhuipy je Tito huidibi xypa'oyich jim, com griegojáy je' anajty, paady ca' yajtiy'ajttíy anajty. ⁴ Ca' ixipy pin huaam ycaminañ jim Jerusalén co Tito ca' yajtiy'ajttíy, co ca' nijëjity mibijcpidijc ycatigíy ayüch ameech huidibi ca' ymibijccixy cixyot huinijot Cristo ytiy'ajt. Hue' ajcxy amido'ijtcixy n'ayucich nej huaad xyjijpcogapxiygixyich. Ca' ajcxy yjotcujcity co ngapxhuäcxyich co nmibijcim Jesucristo, e ca' copicy nguudunim judfojáy ycostumbre. Yi' ajcxy adzip xyajni'huidzaambich yi judfojáy ycostumbre, jadu'n nej jáy codoogíy ajcxy adzip ytuungixy ma yhuindzin ytung. ⁵ Ni catügjaxígy ajcxy xycamimadacyich, e ni xycayaj'amoñ iich ajcxy, com hue' ndzocyich co huen Dios y'ayuc ytiy'ajt oybi ity huädz ma miich ajcxy ca' ma anii.

⁶ Yi apóstoles ajcxy huidibi Jesús ti yhuin'íjxigixy huidibi ajcxy nigohuajc'ajtp yi mibijcpidijc, ca' ajcxy ni ti tiy'ajt xyjacmöyich jemybi huidibi ca' jayijp nnejhuüyich. (Peni capxpaady ajcxy o peni ca' ycapxpaadyity, ca' nduunich cuendi. Com Dios ca' huin'ixpety jáy ajcxy tiyduñ.) ⁷ Co oy ajcxy nejhuüy co Dios ti xyquexyich ngapxhuäcxyich yi' y'ayuc ytiy'ajt ma yi jáy ajcxy huidijaty ca' yjudfojáyity, tim jadu'n nej ti quexy Pedro co capxhuäcxi yi' y'ayuc ma yi judfojáy ajcxy, ca' iich yi' ajcxy anajty n'ayucich xyjijpcogapxiyich,

ooy ajcxy jáygidacy yi n'ayucich ndiy'ajtich. ⁸Yi Dios huidibi Pedro quejx huen yi' y'ayuc capxhuáčxy ma yi judíoáy ajcxy, nañ jadu'n iich xyquejxich co yi' y'ayuc ngapxhuáčxibych ma yi jáy ajcxy ca'p yjudíoáyity.

⁹Je Jacobo, je Pedro etz Juan ajcxy, je huidi nigohuajc'ajtcixp yi mibijcpidijc, co ajcxy nejhuuij jadu'n nej anajty Dios may'ajt oy'ajt ti tuuñ miid iich, chi ajcxy xycöbijcyich agujc jotcujc Bernabé etz iich. E chi iich ajcxy miid nay'ayuc-huinjihuuij co jëbi iich etz Bernabé nícxibich ma yi ca'p yjudíoáyity ajcxy, etz jëbi yi Jacobo, Pedro etz Juan ajcxy ñíxcixy ma yi judíoáy ajcxy. ¹⁰Jëyi ajcxy may'ajt pijctzoy ma iich etz Bernabé co jadu'n pa'ayo'n ndunipyich ma yi judíoáy ayoobitijc. E chi iich ngo'adzoy co ndunamybich jadu'n agujc jotcujc.

Pablo ogy yi Pedro jim Antioquía

¹¹E jadu'n anajty miid ti n'ocnay'ayuc-huinjihuuiyibich ixti coon Pedro ycidacy jim Antioquía. Chi jim nnimaayich huinjijp co ti anajty jim Dios ytiy'ajt midundigooyi co puhuäctuatni je huidibi ca' yjudíoáyity, ca' y'ocmiidcaymujcni. ¹²Com co ca'ni anajty ymiñ jim Antioquía je judíoáy ajcxy huidibi anajty tzomb ma Jacobo jim Jerusalén, chi Pedro miidcaymujcni je jáy ajcxy ca'p judíoáyity. Co ajcxy ymiñ choon Jerusalén, chi Pedro oy puhuäctuatni je huidibi ca'p yjudíoáyity, ca' y'ocmiidcaymugaani anajty. Com

Pedro tzigiiyb anajty co ñi'ojjihuuiyb je judíoáy huidibi minamb co ooy ycopicyity yajtiy'ajttihiuipy tüg'óciy jáy ajcxy huidibi mibijccixp Jesucristo. ¹³Co Pedro jadu'n oy y'idích, chi je jacjadyi judíoáy ajcxy huidi anajty jímip nañ tim jadu'n oy y'idíitczixy. Oy ajcxy janejhuüy tiy'ajt, e huädz cuydungixy. Ixti Bernabé nañ jadu'n y'idíich nej Pedro, com ca' anajty yjotmicity. ¹⁴E co iich jadu'n oy n'ixyich co ca' ajcxy cuydungixy yajxon Jesucristo ytiy'ajt, chi iich nnimaayich Pedro mayjáy'agujc: “Peni miich judíoáy, e ti m'ixmajtzní judíoáy ycostumbre co ti mibicy Jesucristo, e ti m'ocuydumyib je huinma'ñ huidibi judíoáy ca' cuydungixy, ¿nej tijy cham co adzip mdzachminaandägy co yi' ajcxy huidibi ca'p yjudíoáyity, copicy cuydúngxipy judíoáy ycostumbre, huidijaty miich ti m'ixmajtzní?”

Yi judíoáy ajcxy quipxyjaty miid jacpinjaty

¹⁵Jadu'n njacnimaayich Pedro: “Iich etz miich judíoáy iich ajt, huidibi ndaj'ajtim ndeedy'ajtim nañ judíoáy. E ca' iich ajt njadu'nity nej jáy ajcxy ca'pi yjudíoáyity, huidibi ca' cuydungixy Dios ycötujcin je jecyip huidibi Moisés yjayhui'm. ¹⁶Miich Pedro iich ajt nnejhuuiyim co jáy ajcxy ca' jëbi Dios yajpocyñihuächyíi miid tim jëyi co ajcxy cuydungixy Dios ycötujcin je jecyip huidibi Moisés yjayhui'm. Co yi jáy ajcxy mibijccixy Jesucristo, huin'it janchtiy Dios yajpocyñihuätziyb

ajcxý. Nañ tim jadu'n ñich ajt, ti nmibijcim je Cristo jigix jëbi Dios xyajpocyññhuaatzim. E ca' jëbi huaad Dios xyajpocyññhuaatzim ajt miid tim jëyi co ti nguyduunim Dios ycötujcin je jecýip. Ca' ni tüg jäy huidijaty jëbi Dios yajpocynñhuaachyí, miid tim jëyi co cuyduuni Dios ycötujcin je jécýip.”

¹⁷Co ajt nhuinma'ñ nbidaacim co nmibijcim Cristo jigix Dios jëbi xyajpocyññhuaatzim, huin'it je judíojäy yminaangixy co jibic-huinma'ñ nyajtuunim co ca' njaccuyduunim yi' ajcxý ycostumbre. ¿Nej mdijy je Cristo xyajtundigooyim jadu'n nej judíojäy yminaangixy? Ca' yjadu'nity. Ca' jëbi huaad je Cristo xyajtundigooyim. ¹⁸Co ixypy nmijpidaacim jadüg'oc Dios ycötujcin je jecýip, je huidibi ti n'ixmajtzim, jada ixypy iixpejt'ajtp co ndundigooyim ma Cristo ytiy'ajt. ¹⁹Jecý'ajty co nguyduunich anajty Dios ycötujcin je jecýip, huin'it ca' anajty nbaadyich tiy'ajt nej jëbi huaad Dios xyajpocyññhuaachich, e jadu'n nipaady nej jihuüy ti n'ögyich. Paady ycixpi ti n'ixmachich je jécýip cötujcin, e ti nmijpidägyich Jesucristo ytiy'ajt jigix jëbi njactzinäyich miid Dios ycixpi. ²⁰Jadu'n nayjihuiyíijich jadu'n nej jihuüy ti n'oc'o'cpich, jadu'n nej jihuüy ti ngruudzpetyich quipxyí miid Cristo. Jadachambi ca' n'octzinaayñich miid ngi'm jugy'ajtin ycixpi. Hue' je' je Cristo ymic'ajt etz ytiy'ajt ti chinaydacpicy ma ñich njugy'ajtin. E jadu'n nej cham njactzinäyich miid ñich nnin'cx, jactzinaaybich

miid Dios y'ung ycixpi, nmijpidacypich Dios y'ung. Dios y'ung ti xychocyich ti xyjihuiyich, e ti nayyoxyii naydogyii ma yi o'cin miid ñich nbocy ycixpi. ²¹Ca' nniyajtigoya'ñich je may'ajtin je oy'ajtin huidibi Dios ti tuuñ miid ñich ycixpi. Co ixypy jëbi Dios xyajpocyññhuaatzim miid co ajt nguyduunim Dios ycötujcin jëyi, huin'it ixypy ti ñaadig'i'aty je Cristo co y'o'cy miid ajt nbocy ycixpi.

Je ycötucin huidibi Moisés yejc o je mibijcin

3 Janch loci miich ajcxý migügtijc huidibi tzinaayb jim Gálatas naaxjot. Ti jäy ajcxý xyajhuinma'ñdydigoogixy miid jibic-huinma'ñ. Paady ycixp mdzach'ixmadzaangixy je Dios ytiy'ajt. ñich oy njacapxhuächyich ma miich ajcxý mhuinduu je tiy'ajt jadu'n nej Cristo yajcruudzpejti miid ñich ajt nbocy ycixpi. ²Yi' nyaj'amidooyb: ¿Nej ti mbaatcixy Dios yjihui'ñ ymic'ajt miid co mdzachcuyduuni Dios ycötujcin je jecýip? o ¿Nej ti mbaatcixy Dios yjihui'ñ ymic'ajt miid co ti mmidoogixy Jesucristo y'ayuc e ti mmibijccixy? Hue' janchtiy ti mbatcixy Dios yjihui'ñ ymic'ajt co ti mmibijccixy Jesucristo, ca' nminaanim co ti mguydungixy Dios ycötujcin je jecýip. ³Co Dios oga'n yjihui'ñ xy'adigiigyixy xyjottigiigyixy, chi mguychinaaygixy Jesucristo ytiy'ajt nej Dios yjihui'ñ xyhuinma'ñmoogixy. ¿Nej co cham miich ajcxý mloci huinma'ñ

mdzachtungixy? Jadachambi jadüg'oc mdzachtunaangixy mgi'mhuinma'ñ. ⁴¿Nej naadigigixpi miich ajcxy tzaachypi ti mminajxcixy ti myajnajxcixy miid Cristo ytiy'ajt ycixpi? Janch naadigi' jadun tzaachypi ti mminajxcixy ti myajnajxcixy, pen janch tücciyi ti m'ixmájtzcixni Cristo ytiy'ajt. ⁵Jada nyaj'amidoogixyp: ¿Nej ti Dios yjihui'ñ ymic'ajt xy'adigiigixy xyjottigiigixy etz tuñ mijhuinma'ñ ma miich ajcxy miid co ti mguydungixy Dios ycötujcin je jecyip? Ca' yjadu'nity. Hue' Dios xy'adigiigixy xyjottigiigixy etz tuñ mijhuinma'ñ miid miich ajcxy miid co ti mmidoogixy Jesucristo ytiy'ajt etz ti mmibijccixy.

⁶Jadu'n ymiñ cojay ma Dios ñecy co Abraham mibijcy Dios, e co yi' mijpidacy Dios y'ayuc jadun nipaady nej jihuiy Dios yhuinmecxi ypocy, jigix jëbi y'ity tudägy ma Dios yhuinduu. ⁷Jadu'n yjajty miid Abraham. Je' ymibijc Dios, e yajpocyñihuaatzì Dios, jëbi ñaydijyii tudägy jây ma Dios yhuinduu. ⁸Dios jecy'ajty yajnihuinmayiïy co yajpocyñihuädza'ñ je jây ajcxy huidibi ca' yjudfojâyity, jëbi ajcxy ñaydijyii tudägy jây ma Dios yhuinduu, miid co ajcxy mijpidägipy je may'ajt huidibi Dios ytunamyb miid yi' ajcxy ycixpi. Paady ycixpi jaaybety ymiñ ma Dios ñecy co jadun Dios miidmiydac Abraham jecy'ajty co yi' huidibi ca' yjudfojâyity ypaadipy ajcxy y'alma ñidzoocin, com jadun Dios yminañ: “Miid miich tüg m'ap m'oc may'ajt oy'ajt nduna'ñich miid

naaxhuiñyây ajcxy ycixpi.” ⁹Paady ycixpi jadun nej jây ajcxy tüg'óciy pinjaty mibijcp Dios, Dios may'ajt tunamb miid yi' ajcxy ycixpi co mibijccixy, tim jadun nej may'ajt tuun miid Abraham.

¹⁰Dios chaachytunamy jây ajcxy miid ypocy ycixpi, pinjaty huinma'ñ tzachpidacp co y'alma ñidzoocin padaangixy miid co cuydungixy Dios ycötujcin je jecyip. Com jadun jaybety ymiñ ma Dios ñecy: “Dios chaachytunamyb jây ajcxy miid ypocy ycixpi, pinjaty ca' mijpidägy tüg'óciy Dios ycötujcin, etz nañ jadun pinjaty ca' cuydundây jada cötujcin.” ¹¹Jadachambi miid je ayuc huidibi ti nyajnijayiiygixy ma jada necy, jëbi miich ajcxy mnejhuihuip co ca' ni pin jây jëbi Dios yajpocyñihuächyii miid huidijaty ti tungixy co cuydungixy Dios ycötujcin je jecyip. Com jadun ymiñ jaybety ma Dios ñecy ma Dios jadun ymina'ñ: “Yi jây ajcxy pinjaty mibigip iich n'ayuc, yi' ajcxy nyajpocyñihuädzaamybich jëbi ajcxy y'alma paadip ñidzoocin.” ¹²Dios ca' jadun ymina'ñ ma yi' ycötujcin huidibi Moisés yjayhui'm co jëbi nmijpidaacim, e huin'it Dios xyajpocyñihuaatzim. Hue' je' ymina'ñ ma ycötujcin co jëbi xychaachytuunim miid ajt nbocy ycixpi. Com jadun ymiñ jaybety ma Dios ñecy: “Yi jây ajcxy pinjaty cuydumb Dios ycötujcin huidibi Moisés ycojay, copicy cuydundähuip, ni ma ycatundigoyipy.”

¹³Cristo xyñihuaanim xyyajtzoocim ma anajty Dios

xychaachytunaanim miid co ca' nguydundaayim Dios ycötujcin je jecyip. Cristo ci'm ti yajnicxy je tzaachypi huidibi Dios ajt xymöhuaanim anajty. Com jadu'n jaybety ymiñ ma Dios ñecy: "Pinjaty anajty yajmijxotzpejtp ma tüg cruudz, hue' anajty je' yco'ayooyb ypocy tiibi tuñ." ¹⁴Cristo o'c je' miid iich ajt nbocy ycixpi, jigix Dios jëbi cuyduñ yi' y'ayuc jadu'n nej yaj'ahuaniiy Abraham jecy'ajty, co may'ajt tuna'n miid yi jäy ajcxy ycixpi huidibi ca'p yjudíojäyity, etz nañ jadu'n may'ajt tuna'n miid iich ajt ycixpi, jigix jëbi iich ajt nbaatim je Dios yjihui'n co nmibijcim je Cristo.

Je cötujcin huidibi Moisés yejc etz huidibi Dios y'ahuaniiy

¹⁵Migügtijc ajcxy, ngapxticxaamybich jadu'n nej Dios ti tuñ miid tüg iixpejt nej jäy ajcxy ytuñ. Co ixipy tüg jäy necy yajcojy ma nigapxy jadu'n nej ypidägy yajhui'ma'n, e co yajcojtäy je necy, e chi firmijiy, e nañ jadu'n je testigo ajcxy yfirmijiy, huin'it ca' huaad pinjaty nixigy yajxigy jada tiy'ajt, e nañ jadu'n ni ca' huaad yaj'ungiy. ¹⁶Cuenditungixy Dios y'ayuc ytiy'ajt, Dios ma yi' y'ayuc yaj'ahuaniiy Abraham etz tüg yi' y'ap y'oc co may'ajt tuna'n miid yi' ajcxy jëyi. Ca' nminaanim Dios y'ayuc ymina'n co Dios yaj'ahuaniiy Abraham co may'ajt tuna'n miid tüg'óciy yi' y'ap y'oc. Hue' je'Dios y'ayuc ymina'n co may'ajt tuna'n miid tügpajc yi' y'ap y'oc, je' je' je Cristo. ¹⁷Dios ca' yi' nixigy yajxigy ytiy'ajt huidibi jayijp ymoy

Abraham co yajnigüeexy ycötujcin yi Moisés. Co Abraham y'o'cy, ti anajty ñajtnñicxiyñi midaax migo'px ja'iipxmajc jimijt, chiini oy Dios möy Moisés yi' ycötujcin. Tim jadu'n nej ca' huaad yajtigach je jäy ñecy ma nigapxy jadu'n nej ypidägy yajhui'ma'n, nañ tim jadu'n ca' huaad Dios yajtigach y'ayuc huidi yajnimay Abraham jadu'n nej may'ajt tuna'n miid naaxhuiñyäj ajcxy ycixpi. ¹⁸Dios y'ahuaniiy yi' ytiy'ajt ma Abraham jecy'ajty co may'ajt tuna'n miid yi' y'ap y'oc ycixpi etz miid tüg'óciy naaxhuiñyäj ajcxy ycixpi. Co ixipy jëbi jäy padaangixy y'alma ñidzoocin miid huidibi ajcxy ytumyb co ajcxy cuyduuni Dios ycötujcin je jecyip, ca' ixipy may'ajt ti tuñ co ti quexy je Cristo ya naaxhuiñ co jäy yajnihuädzip.

¹⁹¿Ti ycixpi Dios co moy Moisés je cötujcin huidibi ycojay? Hue' je' Dios moy jada cötujcin jigix jëbi niguëxigy co jäy ajcxy ca' ycapxymidoogixy. Tunamb anajty Dios ycötujcin huidibi Moisés ycojay mabaad ti quexy ya naaxhuiñ yi' y'ung, je' je' je Cristo, je Abraham y'ap y'oc huidibi yajpocynñihuätzp jäy ajcxy. Dios ycötujcin hue je' yajnigüeex Moisés miid ángeles ajcxy. E chi Moisés capxnajxy ma ymigügtijc ajcxy. ²⁰Co Dios ti quexy yi' oybi y'ayuc ya naaxhuiñ miid y'ung, paady ycixpi Dios ca' tzocy co huingbi capxnaxipy yi' y'ayuc. Dios etz Dios y'ung tú'ciy yi'.

Tigixpi Dios je Moisés cötujcin yejc

²¹¿Nej mdijy ca' ñaybadyii yi Dios ycötujcin huidibi Moisés ycojay,

miid je ayuc huidibi Dios yajnimay Abraham? Naybaatip ajcxy y'ayuc. Co ixypy cayejcy Dios cötujcin ma jëbi jäy ajcxy y'alma ñndzoocin padaangixy, huin'it ixypy jëbi nbocyñihuaatzim co ixypy nguyduunim yajxon jada cötujcin. ²²Ca' yjanchity co jëbi Dios xyajpocyñihuaatzim miid co tijaty nduunim. Com ma Dios y'ayuc ymiñ cojay co nidüg'óciy jäy ajcxy ti ytundigooy, ac pocy ymiid ajcxy. Jadu'n Dios y'ayuc ymina'ñ, jigix jëbi Dios yajpocyñihuäch tüg'óciy pinjaty mijpidacp Jesucristo, jadu'n nej yajnimay Abraham jecy'ajty co jadu'n tuna'ñ.

²³Ca'ni anajty Cristo ymiñ ya naaxhuiñ, huin'it anajty Dios ycötujcin ytuñ, yajpocycäy jäy ajcxy, e ca' Dios yajcomidoy jäy ajcxy ypocy. Jadu'n nej jihuüy jäy ixypy ypujxtijc'iñaaygixy e ahuijxcixy mina je juez ytiydunáanigixy. Jadu'n anajty n'ijtim jadu'n nej jihuüy nbujxtijc'iñaayim, ixti cooni Jesucristo ymiñ ya naaxhuiñ yajpocyñihuaatzp. ²⁴Jadu'n anajty Dios cuend'aty yi judíojäy anajty miid ycötujcin huidibi Moisés ycojay. Tim jadu'n nej jäy cuend'aty huingjäy y'ung. Jadu'n anajty Dios cuend'aty judío jäy ajcxy ixti cooni Jesucristo ymiñ ya naaxhuiñ jëbi yajpocyñihuäch jäy ajcxy. ²⁵Jadachambi co Jesucristo ti y'oy ya naaxhuiñ, e ti nmibijcim (tzojcingíx) yi' ytiy'ajt, paady ycixpi cham ca' n'oc'ijtim cuend'aty miid Dios ycötujcin huidibi Moisés ycojay.

²⁶Com miich ajcxy ti mmijpidaaccixy Jesucristo ytiy'ajt,

paady ycixp jëbi nidüg'óciy miich ajcxy naydijigixy Dios y'ung.

²⁷Tüg'óciy miich ajcxy huidijaty ti mniibejtcixy, ti mniibejtcixy jigix jëbi mdügmujccixy miid Cristo, jadachambi niducy m'ijtcixy miid Cristo. ²⁸Nidüg'óciy miich ajcxy ti mgöbijccixy Jesucristo jadu'n nej ajcxy mHuindzin. Jadu'n miich ajcxy judíojäy etz nañ jadu'n ca'pi yjudíojäyity, nañ jadu'n miich ajcxy midumbidijc etz miich ajcxy huidibi ci'm nay'ane'mip, miich ajcxy yëydijctijc etz miich ajcxy töxyjäydijc; tú'ciy miich ajcxy myajpattaaygixy ma mHuindzin Jesucristo. ²⁹Huenpinity miich ajcxy co mmijpidaaccixy Jesucristo, huin'it jëbi ajcxy mnaydijiiyb Abraham y'ap y'oc, e huin'it jëbi mbáatcixipy tzinaydac jiiby tzajpjoty, je huidibi Dios yaj'ahuaniiy Abraham, Abraham y'ung y'anäg etz Abraham y'ap y'oc.

4 ¹⁻²Cha jadüg iixpejt yajnimäyich miich ajcxy huidibi capxticxp Dios ytiy'ajt. Tüg comeeñyjäy ymang hue' anajty mutzni pi'cni je' anajty jëdaanip yteedy ypidägy. E chi yteedy tüg jäy yajniibicy huidibi jëbi cuend'aty je pidägy etz je pi'e'anäg mabaad paady je tiempo mina yc'idigihuiigy je pidägy. Je comeeñyjäy y'ung com co anajty ca'ni yeegy, ane'my anajty y'ity, tim jadu'n nej ane'my y'ity je jäy huidibi midumb. ³Tim jadu'n nej je comeeñyjäy y'ung anajty y'ity ane'my, nañ tim jadu'n iich yi judíojäy ajcxy ane'my anajty n'ijtcixyich co anajty ca' tiydudägy naydijiiygixyich Dios

y'ung. ⁴⁻⁵Co oy Dios yajhuaad'ajtni, chi oy quejxni y'ung ya naaxhuiñ. Yí' y'ung ma'xung'ajt judíoJay, jigix jēbi codināy jāy ajcxy ma Dios ycōtujctac. Nañ jadu'n yí' ma'xung'ajt judíoJay jigix jēbi yajpocyñihuāch yí jāy ajcxy huidibi ti yajpocycāhuigixy Dios ycōtujcin huidibi Moisés ycojay. Dios ti quexy y'ung jigix jēbi xycodinaayim miid ajt nbocy ycixpi, e jadu'n Dios jēbi xycōbijci jadu'n nej jihuūy xyci'm'ung'ajtim.

⁶Jadachambi miid co naydijim Dios y'ung, paady ycixp Dios ti xy'adigiayim ti xyjottigiayim yí' yjihuiñ ymic'ajt, paady ycixp ajt minaanim co Dios ajt nDeedy'ajtim etz nminaanim: “iPadre Nuestro!” ⁷Miid co miich ajcxy ti mmibijccixy Jesucristo, jadachambi ca' ane'my m'oc'ljtcixyñi ma Dios ycōtujcin je jecyip, jadu'n nej je jāy ytumbidijc miidity ane'my . Paady ycixp jēbi Dios xymóoygixipy jugy'ajtin huidibi ca' ycixipy ytigoyipy, jadu'n nej Dios miidity jugy'ajtin. Jadachambi miich ajcxy Dios xy'ung'ajt, etz jēbi mbáatcixipy pidāgy ma Dios.

**Pablo yjotmaybaady miid
je mibijcpidijc ycixpi**

⁸Jecy'ajty ca' anajty mnejhuiygixy Dios ytiy'ajt tiydudāgy, ooy anajty m'ojadajtcixy oyñiti huidibi ca' ymic'ajt miidity. E ca' anajty m'ojadajtcixy je Dios tzajpjototyp huidibi mic'ajt miidity. ⁹Jadachambi ti mnejhuiygixy Dios ytiy'ajt etz Dios ti xycōbijccixy. ¿Nej co jadüg'oc mdzachnihuimbidaangixy yí

judíoJay ycōtujcin, ca'p ti mic'ajt miidity, huidibi ti m'ijxmajtcixy? E jadüg'oc xy'ane'mygixy je judíoJay ycōtujcin. ¹⁰Jadachambi mdzachcuydunaangixy judíoJay ycostumbre, jadu'n nej ajcxy myajmij'ajtcixy xiibo' xiijimijt. ¹¹Huinmaaybich ooy miid miich ajcxy ycixpi co naadigí ti nyaj'ixpicyich miich ajcxy. Ninigoob ayoohua'n iich ndung ma miich ajcxy.

¹²Migügtijc ajcxy, cham may'ajt nbijctzooyich ma miich ajcxy. Yajtügiygix yí mhuinma'n jadu'n nej iich nhuinma'n. Fich ti nyajtügiyich nhuinma'n miid miich ajcxy mhuinma'n co ti n'ixmachich yí judíoJay ycostumbre. Je taab anajty n'ityich miid miich ajcxy, ca' miich anajty ajcxy iich n'ayuc xyjijpcogapxiyi. ¹³Miich ajcxy mnejhuiyb co anajty n'ityich ma miich ajcxy, pumāy iich anajty nyajpaady miid yuu pa'm ycixpi, paady ycixp iich jim jecy nhuācxijpyich, ngapxhuācxych Jesucristo ytiy'ajt je jayijp'aty. ¹⁴Miid iich nba'm ycixpi ooy n'adzijpy miich ajcxy ma mjiin mdijc, e miich ajcxy ca' ti xy'ixtijy e ni ca' miich ajcxy xymidzijpich. Jadu'n iich miich ajcxy xycōbijcy agujc jotcujc, tim jadu'n nej ixipy ti mgōbijccixy Jesucristo ci'm. ¹⁵Jadachambi ¿ti ti ytunyi ti yjadyi co ca' mmijotcujc'ajtcixy iich n'ayuc? Com nyejcich tiy'ajt co je taabi anajty oga'n jim n'ityich ma miich ajcxy co janch xypubedaambich miich ajcxy. Ixti mgi'm huin anajty ajcxy mjayajpidzimaangixyp

etz xymöhuaangixyich anajty co iich ngaa'a'ixiy. ¹⁶ ¿Nej iich ti n'ahuimbityich miich ajcxy mmidzip miid co ti nyajnamaaygixy huidibi janchip?

¹⁷ Yi huindzindijc jim ma miich ajcxy huidibi xychachyaj'ixpijccixp huidibi ca' ytiy'ajtity, ca' ajcxy oyhuinma'n miidity. Hue' ajcxy tzachtzocy co miich ajcxy m'ixmájtzcixip iich n'ayuc ndiy'ajt. Hue' ajcxy tzachtzocy co miich ajcxy yi' mgömayipy. ¹⁸ Hich njajotcujcich jadu'n co huingbi huindzin ajcxy jëbi xyaj'ixpijccixy. Nigoobi co ixipy jëbi ajcxy m'oy'ajtin mbaatcixy. Ca' oy copicyity co iich ci'm miich ajcxy nmiid'ijttiihuipy. ¹⁹ Migügtijc huidibi ooy ndzocy njihuüyich jadu'n nej jihuüy ngi'm'ung'ájtigixy, ooy tzaachypi ndzachjihuüyich miid miich ajcxy ycixpi jadüg'oc. Jadu'n tzaachypi njihuüyich jadu'n nej ungday tzaachypi jihuüy co y'ung yajma'xung'ada'n. Njihuihuaamybich tzaachypi ixti cooni miich ajcxy anajty Cristo mhuinma'n xyaj'oyiyyi. ²⁰ Ooy iich njanay'ixxpada'nyii ma miich ajcxy cham cham. Njamiidcapxaangixy njamiidmiydägaangixy, chi ixipy tiy'ajt njacyajnamaaygixy jac huädz. Ooy iich ndajy nmayich miid miich ajcxy ycixpi, nej n'ocjacnimaaygixyipy.

Je Agar etz Sara y'ijxpejt

²¹ Miich ajcxy huidibi mdzachcuydunamyb Dios ycötujcin je jecyip. Nmimaaygixy ajcxy, ¿nej ca'ni ajcxy midoogixy huidibi Dios ycötujcin nigapxyi? ²² Com

Dios y'ayuc huidibi jaybetyip jadu'n ymina'n co Abraham ymiid anajty metz ymang. Tüg je'anajty ytaj'ajtip huidibi ypödumb'ajtpy. Je jadügpi ymang anajty ytaj'ajtip huidibi ytimytöxijc'ajtpy. ²³ Je huidibi je pödumbi y'ung'ajti, hue' je' ypi'c'ajty jadu'n nej pi'ctijc jadyii yma'xung'ajtcixy. Je huidibi Abraham ytöxyijc y'ung'ajti Dios je' miid ymic'ajt ypi'c'ajty, Dios ycuuduun y'ayuc huidibi yajhuinhuaniiy Abraham. ²⁴ Jada jihuimbit ayuc jadu'n yhuimbizimyb: jada Abraham ytöxyjäy ajcxy metz iixpejt'ajtp jadu'n nej Dios ti ytuñ miid yi' yjäy. Je ypödumbi huidi anajty yxii Agar, yi' miid yquipxii yi Dios ycötujcin huidibi Dios ymoy Moisés ma je cop huidi yxii Sinaí. E tüg'óciy jäy ajcxy huidibi cuyduungixp Dios ycötujcin huidibi Moisés ycojay, ane'my ajcxy je' yaj'idyii, tim jadu'n nej tüg comeñyjäy ane'my yaj'ity yi' ytumbi ajcxy. ²⁵ Agar yi' nigix'ajtp je cop Sinaí jim Arabia ñaaxjot ma Dios moy Moisés je cötujcin. Agar je töxyjäy huidibi anajty pödumb, je' miid yquipxii yi judíojäy huidibi tzachcuyduungixp Moisés ycötujcin, etz nañ yquipxii miid Dios y'it ya naaxhuiñ jim Jerusalén. Yi judíojäy etz y'ung y'anäg ajcxy huidibi tzach cuyduungixy Moisés ycötujcin je jecyip, ane'my ajcxy y'lity ma jada cötujcin, tim jadu'n nej jäy ajcxy huidibi tumb ma comeñyjäy, e y'ane'my ajcxy y'ijtcixy. ²⁶ Je Sara huidibi Abraham ytöxyijc'ajtpy, yi' miid yquipxii iich ajt huidibi cuydumb je Cristo ytiy'ajt, e je Cristo yi' yajpatp tzajpjoty. ²⁷ Com jaybetyity ymiñ ma Dios ñecy co

mayjäy paada'n oybi ma Dios, com
Dios jadu'n ymina'n:

Jotcugi' jadüg'oc miich Sara
huidibi ca' y'ungbaady. Xic
yäh miich miid jotcujc'ajtin,
miich huidibi ca' ungmoj.
Nigi ymayihua'n miich m'ap
m'oc ca'ydi Hagar y'ap y'oc.

²⁸Ich ajt huidibi nmijpidaacim
Jesucristo tügiyim miid Abraham
ymang Isaac. Com jadu'n nej
Dios cuyduuñ y'ayuc huidibi
yajhuinhuaniiy Abraham co Isaac
yma'xung'ajty, nañ tim jadu'n Dios
cuyduuñ yi' y'ayuc miid ich ajt co je
Cristo y'oy ya naaxhuiñ. ²⁹Tim jadu'n
nej Abraham ymang Ismael jecy'ajty
midzip'ajty Abraham ymang huidibi
Dios yajhuinhuaniiyi Abraham;
nañ tim jadu'n yi jäy ajcxy huidibi
tzachcuydungixp Dios ycötujcin je
jecyip, ooy ajcxy tzach midzip'adyii
yi jäy ajcxy huidibi mibijcp Jesucristo.

³⁰Oc-huinmay miich ajcxy nej
jaybetyity ymiñ ma Dios ñecy co
jadu'n Dios nimay Abraham:

Yajpidzim ma mdijc je mbödumbi
miid ymang. Com ca' jadu'n
ytiy'ajtity co je pödumbi ymang
paadipy miich mbidägy. Yi' je'
padamb je mbidägy huidibi
miich mdöxyijc ymang'ajtpy.

³¹Migügtijc ajcxy, ca' ich ajt
n'ocjadu'niñ nej je pödumbi y'ung
y'anäg ajcxy huidi ane'my ijtp.
Jadu'n ich ajt nipaady nej Abraham
ytöxyijc y'ung y'anäg huidibi ca'
y'ane'my y'ity.

**Cristo ti xyajnihuaatzim ma je
cötujcin huidibi Moisés yejc**

5

Je Cristo ti xyajpidzimim
ma Dios ycötujcin je jecyip

ma anajty n'ijtim y'ane'my, jigix
jëbi tzojcingix nguyduunim yi'
ytiy'ajt. Mibijccixy tiydudägy
Cristo ytiy'ajt, ca' m'ixmajtcixy.
Ca' mni'ahuimbijtcixipy jadüg'oc
Dios ycötujcin je jecyip ma anajty
m'ijtcixy tim jadu'n nej comeeñjyäy
ytumbi ajcxy y'ijtcixy ane'my.

²⁻³Amidoo'ijtcix ich n'ayuc.

Jadachambi ich Pablo minaambich
pen miich ajcxy mgöbigamyb jada
ayuc co copicy myajtiy'ajtihiipy,
huin'it ñaadig'ada'n co mmibijccixy
Jesucristo ytiy'ajt. Ca' Jesucristo
may'ajt tuna'n miid miich ajcxy
pen jadu'n m'ididza'n. Jadüg'oc
nmina'nich co pinjaty jadu'n
ycuydunamyb tüg Dios ycötujcin,
copicy ycuydundähiipy tüg'óciy.

⁴Pen mjiip'ijxyp ajcxy co Dios
xyajpocyñihuätzaangixy miid co
mguyduungixy tüg Dios ycötujcin,
jadu'n nipaady nej jihuüy ti
m'ixmajtcixni Cristo y'ayuc ytiy'ajt.
Pen ca' mmijpidaaccixy je may'ajt
oy'ajt huidibi Cristo ti tuñ ninigoob
miid miich ajcxy ycixpi, huin'it
ca' Dios xyajpocyñihuätzcixipy.

⁵Njiip'ijxim co Dios
xyajpocyñihuädzaanim jigix jëbi
naydijim tudägy ma Dios yhuinduu
miid co nmibijcim Cristo etz miid
co je Espiritu Santo xypubejtim.

⁶Co nmibijcim ajt Jesucristo,
Jesucristo ca' cuendituñ pen ti
nyajtiy'ajttiyyim o pen ca'. Jëyi yi'
tzocy co naychojcin nayjihuiyyim
nidüg nidüg, e jada je' je' ijxpejt co
nmibijcim yi' ytiy'ajt.

⁷Jayijp'aty oy yajxon anajty
m'occuydungixp Jesucristo ytiy'ajt.
¿Pin ti xy'agapxiygixy co ca'
mgapxymidohuaangixy tiy'ajt? ⁸Yi

jäy ajcxy huidibi ti xy'agapxiygixy ca' ajcxy tiy'ajt patcixy ma je Dios huidibi ti xyhuin'ijxim jigix jëbi nmibijcim Cristo. ⁹Miich ajcxy mnejhuiyb co jäy pidaaccixy levadura ma harina jich je levadura yajtiyiydaayb je jich. Nañ tim jadu'n jada anii huidibi jäy ajcxy ti pidaaccixy ma miich ajcxy yajtiyidähuamyb miich ajcxy mjot mhuinma'n. ¹⁰Com iich nmibijcpich co ajt je nHuindzin Jesucristo oyhuinma'n xymöhuipy ajcxy, paady ycixp njijp'ijxypich co miich ajcxy mmibigaamyb iich ngapxy iich n'ayuc. Dios chaachytunipy je jäy ajcxy huidibi ti xyajhuinma'nydigooygixy. Oy ooy yjamij yjajanchity ajcxy, ca' ytimyñéjity, Dios yi' ajcxy tzaachytunib.

¹¹Migügtijc ajcxy, co ixypy yjanchity co iich ngapxhuäcxyich co copicy nidüg'óciy jäy yajtiy'ajttihiuipy, ¿nej co je'ni chambaad judíojäy xychach'ixhuidityich xychachpahuidityich? Pen ca' ixypy xy'ixhuidityich xypahuidityich jadu'n nipaady nej jihuüy nyaj'ixpicyich co je Cristo ca' y'o'cy miid iich ajt nbocy ycixpi. ¹²Yi' huidi ajcxy xyajhuinma'nydigooygixyp, ooy ixypy y'o'yity co ixypy ajcxy xypuhuäctuatni tücciyi.

¹³Dios miich ajcxy ti xymijhuoogixy ma yi' ytiy'ajt jemybi jigix jëbi m'ixmájtzcixni je Dios ycötujcin je jécyp, etz tzojcingix mijpidägipy Cristo ytiy'ajt. Dios ti ajcxy mdü'aa xy'ahuaatzì, per ca' huaad

mduongixy je jibicpi huidibi mjot mhuinma'n chachñijot'ajtcixpy. Hue' a'oy naymi'oyjäy'ájtigix nidüg nidüg, naybubéjtigix miñ xyipy. ¹⁴Dios y'ayuc ymina'n: "Mi'oyjäy'adipy mmijiin mmidijc, tim jadu'n nej miich ajcxy mdzocy co mmijiin mmidijc xymi'oyjäy'adipy." Co jadu'n ajcxy mnaymi'oyjäy'adiyb miñ yxipy, ytimyñipatyp jadu'n nej jihuüy ti mguydundäy tüg'óciy je Dios ycötujcin. ¹⁵Pen miich ajcxy mnaymidundigooyip etz mnaymijotma'tip miñ xyipy, ca' yjetyity co ci'm anajty jadu'n mdza chnayyajhuinma'nydigooygixy miñ xyipy.

Je jugy'ajt huidibi yi Espíritu Santo yejcpy

¹⁶Jada capxhuijin iich miich ajcxy nyajnijayiyb. Cuychinaaygix je Dios ytiy'ajt jadu'n nej je Espíritu Santo xyhuinma'nymooygixy ajcxy. Ca' mguyduungixy je jibic-huinma'n huidibi mdzachnijot'ajtcixyp ci'm. ¹⁷Je jibic-huinma'n huidibi mdzachnijot'ajtcixyp, hue'ymidzip'ajtpy je oybi huinma'n huidibi je Espíritu Santo xymooygixp. Dios y'ayuc obyì ca' ñaygodigiyi miid miich ajcxy mjibic-huinma'n. Paady ycixp miich ajcxy ooy mjacuydunaangixy Dios y'ayuc, e ca' ajcxy mmimadäga'n ñicxy mguydundaaygixy. ¹⁸Pen tzojcingix mguyduungixy je Cristo ytiy'ajt huidibi Dios yjihui'n xymooyb ajcxy, huin'it ca' copicy mguydúngixipy Dios ycötujcin je jecyp.

¹⁹Com nnejhuiydaayim jadu'n nej jäy ajcxy yjot

yhuinma'n̄ tzachnijot'ajtcixy jibicpi. Jadu'n nej yëydijctijc tzachmigapxtigoyaangixy töxyjäydijc; e nañ jadu'n nej töxyjäydijc ajcxy ooy yëydijctijc tzachmiid'ügangixy etz miid'edzaangixy etz ma yijiibi ji ajcxy yhuinma'n̄yidigooygixy. ²⁰E nañ nnejhuiiyim jadu'n nej jäy ajcxy tzach'ojadajtcixy tzachhuingoxтинаaygixy je huidibi jäy ajcxy ci'm ti yajcojy, etz nej jäy ajcxy tzach'ojadajtcixy tzachyajtunaangixy caxpojcpidijc, nej jäy ajcxy ymigüg tzachmijotma'tcixy; nej jäy ajcxy ca' tzip yjot'ambijccixy miid yinjaty huenjaty ayuc; nej jäy ajcxy tzachmidzip'ajtcixy ymigügtijc; nej jäy ajcxy tzachyajca'oy'ijxcixy ymigüg co tijaty miidity; nej jäy ajcxy chachnaybijc-huäcxáanigixy, huidibi abicy tzachmiid'adamb yjäy. ²¹E nañ nnejhuiiyim jadu'n nej jäy ajcxy abijctigihuaangixy tijaty ymigüg ymiid; nej jäy ajcxy ymigüg yaj'o'ccixy; nej jäy ajcxy nijot'ajtcixy ügi etz adzuuhuididii agoodzhuididii, etz yi jäy ajcxy huidibi tzachnijot'ajtcixp yi jadu'mbi huinma'n̄. Hich miich ajcxy cham njacyajnimaaygixy jadu'n nej iich jayijp'aty ti n'ocnigapxpich, co yi jäy ajcxy huidibi yi jadu'mbi jibic-huinma'n̄ chachnijot'ajtcixp jadu'n nej cham ti nijayiiygixy, ca' ajcxy tzinaydac paadaangixy ma Dios y'ane'my.

²²Hue' ajt jadachambi nejhuiydaayim je oybi huinma'n̄ huidibi Espíritu Santo yejcy. Co yi jäy ajcxy huidibi ymiid Dios yjihui'n̄ ymic'ajt ma yjot

yhuinma'n̄, hue' ytungixyp ajcxy yi oyjäy'ajtin miid ymigügtijc; miid ajcxy xondaacin etz miid ajcxy jotcuje'ajtin; etz ymimexxtujcixyp ymigügtijc; etz chojccixyp yjihuiygixyp ymigügtijc; etz ytungixp oybi; etz tudägy yjäy'ajtcixyp, ²³nicy xeemy yjäy'ajtcixy ma ymigügtijc; etz ci'm yajxon ñay'ane'migixy ma yi oybi. Ca' ji huingbi cötujcin huidibi jada oybi huinma'n̄ jijpcogapxihiipy. ²⁴Tüg'óciy jäy ajcxy pinjaty Jesucristo Huindzin'ajtp, mimadacpy ajcxy yi jibic-huinma'n̄ huidibi ci'm nijot'ajtcixyp miid Cristo ymic'ajt. ²⁵Miid co nmiid'ajtim je Espíritu Santo ymic'ajt ma ajt ndzinaayin njugy'ajtin, paady ycixp tzoc tzaayim jadu'n nej xy'ane'mim xyhuinma'n̄ymooyim je Espíritu Santo.

²⁶Ca' huaad amij agix ndzachnayjihuiiyim, etz nañ jadu'n ca' huaad nmigügtijc nyajjotma'tim; etz ca' huaad ni ti nyajca'oy'ijxim.

Naybubéjtigixy miñ xyipy

6 Migügtijc ajcxy, pen mbatpy tüg migüg huidibi jibic-huinma'n̄ ti ymimadägyii, miich ajcxy huidibi mimadacyp yi jibic-huinma'n̄ miid Dios ymic'ajt mbubéjtcixipy jada migüg, e co mbubéjtcixipy jada migüg, nigí jotmic mmigapx miid oy gapxy oy ayuc. Naygüend'adii ajcxy ci'm, ca'ydi jibic-huinma'n̄ xymimadaaccixy. ²Naybubéjtigix nidüg nidüg pinjaty ayo'n jotmay miid. Co jadu'n mdúngixipy, hue' anajty ajcxy mguydungixyp Cristo ycötujcin huidibi ti xymooyim ajt.

³Pen ji pin ñayjihuiyii amij agix etz chach naygömaya'ñyii ci'm co chach y'oyjäyity, ca' je' choobaady ma Dios yhuinduu. ⁴Jëbi nidüg nidüg jäy ñayjihui'ñybigyii nej chinäy yjugy'aty, pen oy o peni ca'y'oyity. Peni ycuychinaayb yajxon Dios ytiy'ajt oybi, jotcuje ñayjihuihuiyb je' ci'm e ca' huaad yajquixpïy chinaayin miid huingbi. ⁵Nidüg nidüg jäy ci'm chinaayin jëbi yajnicxy nej Dios jäygidägy. Ca' huaad ni'ijxtüdy nej ymigüg jibic-huinma'n miidty.

⁶Yi jäy ajcxy pinjaty ti ixpicy Dios y'ayuc ytiy'ajt, copicy co möhuipy tijaty yajmayajtpy je huindzin tiibi yaj'ixpiigyii.

⁷Ix ajcxy ci'm mnayhuin'lingix com Dios ca' yi' ni pin huaad nixigy yajxigy. Com pen miich ajcxy jibic-huinma'n mdumyb, Dios xychaachtunip ajcxy. Pinjaty oybi tuumb, ñañ ypaadipy oybi, e pinjaty jibicpi tumb, ñañ jibicpi ypaadipy.

⁸Pinjaty jibic huinma'n tum jadu'n nej jibicpi tzachnijot'aty, co y'ögipy yi' y'alma ñicxip ayoodactuuby. Pinjaty cuydumb Dios ytiy'ajt jadu'n nej je Espíritu Santo huinma'n ymöyii, co y'ögipy yi' y'alma huingbi jugy'ajtin ypaadamyb huidibi nimina ycaacixy ycaatigooy huidibi je Espíritu Santo möhuiib.

⁹Peni nduunim jabom jabom oy huinma'n ca' huaad ndzjipim, jëbi nmecxtujcim ixti cooni anajty nbaatim oybi ma Dios. E ca' huaad njotmetzciiyim. ¹⁰Tzoc oyjäy'ajtin tuunim ma nidüg'óciy jäy ajcxy, jadu'n nej Dios xyhuinma'ñymooyim. Nigi tzoc pubejtim nmigügtijc huidibi mibijcp mijpidacp Cristo.

**Ane'min, capxhuijin etz capxpooocxin
huidibi cijxnip je necy**

¹¹Ijxcix huindicxcix jada letra mijjatypi huidibi iich ci'm njaayb, com ndzojcpyich co mnejhuiyigixipy nej yam nijayiygixy. ¹²Yi jäy ajcxy huidibi mibijcp co Cristo o'cy ma yi cruudz miid ajt nbocy ycixpi etz ñañ jadu'n mijpidacp yi tiy'ajtti'huii, hue' ajcxy tzach ñaygömayaanigixy ma yi judíojäy ajcxy, jigix ca' pin y'ixhuididiyb ypahuididiyb. ¹³Yi huidi ajcxy tzach mijpidacp tiy'ajtti'huii, ñañ ni ca' ajcxy cuydundäy tüg'óciy jada Dios ycötujcin je jecyip. Hue' yi' ajcxy tzojccixy co miich ajcxy myajtiy'ajtti'huiip jigix ajcxy jëbi ñaygömáayigixy miid co miich ajcxy ti myajtiy'ajttiyyigixy. ¹⁴Yi jäy ajcxy huidibi jim yaj'ixpijcp anii, ci'm ajcxy chach ñaygömayaanigixy. Per iich ca' jadu'n naygömaya'ñyijich miid huidibi ndumybich huidibi nyaj'ixpijcpyich. Hue' janchtiy ngapxpadaamybich iich ajt nHuindzin Jesucristo ytiy'ajt, jadu'n nej yajcruudzpejti miid ajt nbocy ycixpi. Co ti nmibicyich Cristo Jesús, huin'ti ti n'ixmachich je naaxhuiñyjäy yjibic-huinma'n. E paady cham ni nga'ocnijot'ajtnich yi jibic-huinma'n. ¹⁵Co nmibijcim Jesucristo, oy ixypiy ti nyajtiy'ajttiyyim o oy ixypiy ca' ti nyajtiy'ajttiyyim, ca' ma choobaady. Huidibi tzoubatp yi' je' co nmibijcim Jesucristo, etz co nmiid'ajtim jemybi jot huinma'n. ¹⁶Huen Dios xyajjotcugihuipy etz

xypa'ayoohuipy, etz nañ jadu'n
yajjotcugihuipy etz pa'ayoohuipy
nidüg'óciy jäy huidijaty cuydumb
Cristo ytiy'ajt, tüg'óciy Dios yjäy
janchypi tiydudägypi.

¹⁷Jadu'n nej jadachambi, etz
jadu'n nej xii tiempo jacmiimb
jaccidaacp, ca' iich pín huaad
xyjac'amayíyich, com nmíidich

je tiy'ajt ma nninícxich jadu'n
nej jäy ajcxy ti xyhueenduuñich
ti xychaachytuuñich miid co ti
nduuñich miid Jesucristo ycixpi.

¹⁸Migügtijc ajcxy, huen iich
ajt nHuindzin Jesucristo tunipy
nīgi may'ajt oy'ajt ma miich
ajcxy. Jadu'n jada ngapxycíxyich.
Amén.